



Inatsisartunut ilaasortaq, Lars Poulsen, Siumut
/maani

Tunami attaveqaatit qaammataasatigoortut pillugit § 37 naapertorlugu apeqquteqaammut 218-2022-mut akissut

30-12-2022

Suliaq normu: 2022 -24912

ID. nr. 82672386

Asasara Lars Poulsen

Inatsisartut suleriaasianni § 37 naapertorlugu Tunumi attaveqaatit
qaammataasatigoortut pillugit Naalakkersuisunut apeqquteqaateqarputit. Apeqqutitit
uannit akineqartussatut innersuunneqarput. Apeqqutitit matuma kinguliani
ataasiakkaarlugit allanneqarput, akissummillu malitseqarlutik.

Postboks 909

3900 Nuuk

Tlf.: (+299) 34 50 00

E-mail: box909@nanoq.gl

www.naalakkersuisut.gl

Apeqqut 1. Naalakkersuisut tunumi attaveqaatit qaammataasatigoortut ajoquteqakulanerat sumik tunngaveqarnerisooq ilisimatitsissutigisinnaavaat?

Akissut: Tunumi attaveqaatit qaammataasatigoortut pitsaassuserpiaat pillugit
Naalakkersuisuniit ilisimaneqanngilaq, taamaallaalli ajornartorsiutit tamanut tunngasut
ilisimaneqarlutik.

Attaveqaatini qaammataasatigoortuni ajornartorsiutit marluupput. Ilaatigut
qaammataasamut ungasissuseq peqqutaalluni attaveqarniarneq kingusinaarluni
apuuttarpoq. Ilaatigut qaammataasat pisinnaasaat immap naqqatigut kabelit
pisinnaasaannut naleqqiullutik killeqartorujussuullutik. Tamatuma kingunerisaanik
pisinnaasat annertusitinneqanngippata, atuisut amerliartortillugit attaveqaatit
ajornerulertussaapput. Tamatumani pingaartumik Tasiilami nunaqarfiinilu tamanna
ajornartorsiutaavoq, tassani atuisut attaveqaatinik ataatsimoorussisut
amerlangaatsialersimmata.

Tusass attaveqaatinik qaammataasatigoortunik pitsanngorsaaniarluni suliamik
ingerlatsisoq Naalakkersuisunit ilisimaneqarpoq, kisiannili maannakkorpiaq immap
naqqatigut kabelit pisinnaasaasa assinginik pissarsisoqarsinnaanani.

Apeqqut 2. Attaveqaat aqqiissutaasoq pitsaanerpaaq maannamut atuutsinneqarpa?

Akissut: Tusass-imiit qaammataasatigut attaveqarnermi ingerlatsineq tuniniagaqartoq
taarserniarlugu sulissutigineqarpoq, tamatumani sumiiffinni qaammataasamiit
tigooqqaaffiusuni pisinnaasanik pitsaanerusunik pissarsiffigineqarnissaa
naatsorsuutigineqarpoq. Tusass-imiit Spaniami qaammataasatigut attaveqarnermi
tuniniagaqartoq Hisparsat maanna tuniniagaqartumut taarsiullugu
isumaqatigiissuteqarfigineqarpoq. Isumaqatigiissuteqarnermi Tusass Hisparsat-ip
tuniniagaasa immikkoortuinut sunniuteqarsinnaanissamut periarfissaqalerpoq,
taamaalillunilu Kalaallit Nunaannut attaveqaatit pitsaanerulissapput. 2023-mi

qaammataasap nunarsuarmi kaaviiarisussanngorlugu aallartinneqarnissaa naatsorsuutigineqarpoq. Tamatuma pinissaanut Tusass-ip nunami sakkortusaaviit, qaammataasamit nutaamit tigooqqaasussat suliarissavai. Qaammataasaq nunamilu sakkortusaaviit naammasseriarpata, sumiiffinni qaammataasamiit tigooqqaaffiusuni nalunaarasuartaatitigut attaveqaqatigiinnerit annertuumik pitsanngornissaat Naalakkersuisunit naatsorsuutigineqarpoq.

Siunissami ungasinnerusumi qaammataasat nutaat, Low Orbit Satellites-inik taaguuteqartut, attaveqaatinik pitsaanerulersitsisinnaasutut neriuuteqarfigineqartut atorneqalissapput. Taakku nunarsuarmut qaninnerusumiittussaapput, taamaalillunilu attaveqarnerit kingusinaartarneri pillugit annikinnerulertussaavoq. Qaammataasat taamaattut arlallit aallartinneqareeraluartut, suli periarfissat ersarinnerulersitassaallutik. Tassani ilaatigut attaveqaatinut akit, aammalu suliffeqarfik tatigisinnaaneripput pineqarpoq. Tusass ilisimatitsivoq, periarfissat eqqumaffigineqartut, suliffeqarfiillu oqaloqatigineqarnissaat pitsanngorsaanissarlu anguniarneqartoq.

Apeqqu 3. Naalakkersuisut ullumikkornit pitsaanerulersinniarlugu suliaqartoqarniarpa?

Akissut: Naalakkersuisut nalunaarasuartaateqarnermut politikkimik, ilaatigut najugaqarfiusunut attaveqaatinut minnerpaaffissatut piunasaqaatinik aalajangersaaffiusussamik suliaqarput. Piunasaqaatit Tusass-imit atuutsinneqalertussaassapput, kisiannili periaatsit suunissaannut Naalakkersuisut piunasaqaasersuutaasinnaasunik suli eqqartuisimanngillat. Piunasaqaatinili pingaarnertut innuttaasut pisariaqartitaat aallaaviussapput, suliassani periarfissat aningaasaqarnermullu killissarititaasut eqqarsaatigineqartariaqarlutik.

Apeqqu 4. Immap naqqatigut Tasiilap kaabililerneqarnissaanut pilersaaruteqartoqarpa?

Akissut: Naalakkersuisut tamanna pillugu pilersaaruteqanngillat, aamma Tusass taamaattunik pilersaaruteqarnerisigut ilisimaneqanngilaq.

Periarfissaq qaninnerpaaq tassaavoq Island. Tusass ilisimatitsivoq, Danmarksstrædet, Kalaallit Nunaata Islandillu akornanni pissutsit unammillernartorpassuaqarnissaa naatsorsuutigineqarpoq. Immap naqqatigut kabeliisooqassappat annertooujussuarmik aningaasaliisooqarnissaa pisariaqartussaavoq. Sumiiffik sikorsuaqartorujussuusarpoq, taamaattumillu immap naqqaniit uuttortaanerit, immap naqqatigut kabelimik siaarsinerit tamatumalu kingorna ingerlatsineq ajornakusoortorujussuusussaasut ulorianartorsiorfiusussaanerilu takorloorneqarsinnaalluni. Taamaattumik qaammataasaniit attaveqaatit pitsaanerulersinneqarnerisigut attaveqaatinik pitsannguinissaq Tusass-imiit sulissutigineqarpoq, takuuk apeqqu 2-mut akissut.

Apeqquut 4a. Taamaappat qaqugu pilersaarutaava?

Akissut: Takuuk apeqquut 4-mut akissut.

Apeqquut 4b. Qanorlu akeqarnissaa naatsorsuutigineqarpa?

Akissut: Islandip Tasiilallu akornanni immap naqqatigut kabelip qanoq akeqarnissaanut tunngavissalimmik missingersuusiortoqarsimanngilaq.

2016-imi § 37 naapertorlugu apeqquuteqaammut 183-imut atatillugu Tele-Post naliliivoq, Islandip aamma Tasiilap akornanni immap naqqatigut kabelip suliarineqarnissaanut 400 mio. koruunit missaannik aningaasartuuteqartoqassasoq, kiisalu immap naqqatigut kabelip Ittoqqortoormiunut atasunngorlugu sananeqarneranut aningaasartuutit 350 mio. koruuninik missaannik amerlassuseqassasut. Malugalugu taakku missingersuusiaagallartunik aallaaveqarmata. Tamatuma saniatigut immap naqqatigut kabelimut suliaqarnernut ullumikkumut nalimassassagaanni akit qaffangaatsiarsimanissaat ilimagineqartariaqarluni.

Neriuppunga qulaani allaqqasuni apeqquuteqaatitit akineqartut.

Inussiarnersumik inuulluaqqusillunga



Erik Jensen